



Hans Enoksen  
Partii Naleraq sinnerlugu Inatsisartunut ilaasortaq

## § 37 naapertorlugu apeqqu 89/2019-imut akissut

- 1. Dronning Ingrid napparsimavissuaniit, kiffartuunneqassagaanni suut Nuummi najugaqartunut periarfissaappat aamma Nuummi innuttaasunut immikkut ittumik peqqinnissamik isumaginnittoqarfimmiit sullissisoqarnerluni?**

### **Akissut:**

Dronning Ingridip Napparsimmavissua (DIN) nunap immikkoortuani Sermersuumi innuttaasunut napparsimmavittut aammalu nunatsinni innuttaasunut tamanut nuna tamakkerlugu napparsimmavittut atuuppoq.

Dronning Ingridip Peqqissaavia (DIP) Nuummi innuttaasunut tamanut peqqissaaviuvoq aammalu nakorsatut suliassat nalinginnaasut neqeroorutigineqartarnerat isumagisaralugu. Taamaalillunilu suliassat nunap immikkoortuini allani nunap immikkoortuisa peqqissaaviini isumagineqartartut annerpaartaasa assigi DIP-imit ingerlanneqartarput. DIP-imili unitsinneqarnissamat periarfissaqanngilaq. Innuttaasut annertunerusumik misissorneqarnissamik, katsorsarneqarnissamik unitsinneqarnissamilluunniit pisariaqartitsisut nunatta sinnerani innuttaasut assigalugit Dronning Ingridip Napparsimmavissuanut innersuunneqartarput.

DIP-imi uninngasunut siniffeqanngilaq, taamaattumillu innuttaasut Nuummeersut piffissami sivikinnerusumi unitsinneqarnissamik pisariaqartitsisut DIN-imi unitsinneqartarput, akерlianik nunap immikkoortuini allani najukkaminni unitsinneqartarlutik.

Tassanngaannartumik napparsimalersimangikkaanni (soorlu toqqusaarlunneq imal. uummammik kassuttoorneq) ulloq 17. december 2018-imit ulloq 2. januar 2019-ip tungaanut nakorsamat inniminniisoqarsinnaanngitsoq 2018-imi decembarimi DIP-imit nalunaarutigineqarpoq. Taamaakkaluartoq tassanngaannartumik pinngitsut eqqarsaatigalugit DIP-imi nakorsamat misissorneqassagaanni ullut suliffiusut qulit ingerlasinnaasarput. Tassanngaannartumik pinngitsut assersuutigalugu tassaasinnaapput seeqqukkut annissakkullu ippigusuutit misissorneqartariaqartut. Ullut qulit sinnerlugit utaqqiffiusussamik nakorsamat misissorneqarnissamat piffissaliisarnermi takkutinnitsoortartut amerlasarput. Tamanna tunngavigalugu aamma nalliuttut juullernalu eqqarsaatigalugit januarimi nakorsamat inniminniisoqassanngitsoq DIP-imi aalajangerneqarpoq.

Taamaattumillu nakorsat Nuummi innuttaasunik sullissisussat ikittuinnaanerat misissortinnissamat sivisunerusumik utaqqinnissamat kisimi pissutaanngilaq. Pissutaaqataapput DIP-imi ullut nalinginnaasumik sullissiviusut amerlassusiat pissutigalugu piffissaq utaqqiffiusartoq – ullut qulit- kiisalu juullip ukiortaallu akornanni piffissap ulluni amerlasuuni nalliuttoqarfiunera.

20-02-2019  
Sags nr. 2019 - 4178  
Akt nr. 10043107

Postboks 1160  
Tlf: 34 50 00  
Fax: 34 55 05  
3900 Nuuk

Email: [pn@naaqq.gl](mailto:pn@naaqq.gl)  
[www.naalakkersuisut.gl](http://www.naalakkersuisut.gl)

**2. Naalackersuisut Nuummi innuttaasunut immikkut pigisassaannik imaluunniit allaanerusumik napparsimavissamik illoqarfimmi innuttaasunut kiffartuussissallutik pilersaaruteqarpat?**

Akissut:

Nuummi innuttaasunut maanna napparsimmaviup saniatigut Nuummiunut immikkut napparsimmaviliortoqarnissaanik Naalackersuisut annertunerusumik pilersaaruteqanngillat. Aammattaaq apeqqut 1-imut akissut innersuussutigineqarpoq.

**3. Aningaasaliinerit qanoq ittut atorlugit allatulluunniit Nuummi innuttaasut naammaginatut napparsimaveqarnikkut aamma peqqissutsip tungaatigut kiffartuutissallugit, uani nakorsiarfik ilanngullugu Naalackersuisut qanoq isumaqarpat?**

Innuttaasut katitigaanerata ukiuni kingullerni 40-ni ineriartornerata nassatarisaanik Nuummi innuttaasut marloriaatinngungajallutik amerleriaateqarput. Tamatuma nassatarisaanik nunatsinni innuttaasut 32 %-iisa missaat ullumikkut Nuummi najugaqarput. Siumut takussutissionerit takutippaat nunatsinni innuttaasut 40 %-ii 2040-mi Nuummi najugaqalersimassasut naatsorsuutigineqartoq. Nuummi innuttaasut amerliartornerat ilutigalugu Dronning Ingridip Peqqissaaviani nakorsat, peqqissaasut il.il. amerlisinniarnissaat peqqinnissaqarfiup iluatsissinnaasimangilaa. Tamatumani pingaartumik pissutaavoq maanna aningaasaliissutaasut innuttaasut nuttariaasiannut naammanginnerat, tassa ataatsimut isigalugu nunatsinni sumiiffinni tamani sulisut ikinnerpaaffissaanniimmata. Tamatuma nassatarisaanik Dronning Ingridip Peqqissaaviani peqqissaanermik sulisut ataatsimut isigalugu amerlassusiat ukiuni arlaqalersuni allannguuteqarneq ajorpoq, akerlianillu innuttaasut, taamaalillunilu peqqissutsikkut sullississutinik pisariaqartitsineq Nuummi annertusiartuaarluni. Tamatuma saniatigut pisariaqartinneqartut aaqqiivigiumallugit peqqissaanermik sulisunik naammattunik sulisussarsiortarnermi unammilligassaqarpoq, tamannalu Nuummi nunallu sinnerani innuttaasut peqqinnissakkut sullinneqarneranni soorunami malugineqarsinnaasarluni.

Tamanna tunngavigalugu Peqqinnissaqarfimmut aningaasaliissutit sulisullu innuttaasut katitigaanerata ineriartorneranut, taamaalillunilu peqqinnissakkut sullississutinut pisariaqartinneqartunut naapertuuttumik qanoq malinnaatinneqarsinnaanerat 2019-ip ingerlanerani aallunneqarnerussasoq Naalackersuisunit kissaatigineqarpoq.

**4. Atortorissaarutitigut aamma ineqarniarnikkut amigaateqartoqarpat, aningaasaliinerit qanoq ittut atorlugit allatulluunniit pisariaqartitsisoqarpa? Pisariaqartitsisoqarpat Naalackersuisoq qinnuigineqarpoq pisariaqartitap annertussusaata nassuiaasersornissaa.**

Dronning Ingridip Napparsimmavissuata illutai 1980-imi atorneqalerput, taamaalillutillu init nallaviit katsorsaasarfiillu inillu taakkununga atatinneqartut piffissamut naleqqukkunnaarput aammalu sulineri avatangiisinut piumasaqaatinik eqquutsitsiunnaarlutillu katsorsaanermillu ingerlatsinerimut aqutsinermullu naapertuukkunnaarput. Illutat aserfallapput, taamaalillunilu DIN-ip nutarterneqarnissaa napparsimasullu najugaqarfiata allilerneqarnissaa pisariaqartinneqarput. Peqqinnissaqarfimmi nutarterinerimut pilersaarummi sanaartornermut pilersaarut nutaaq, Peqqissutsimut Naalackersuisoqarfimmit suliarineqartoq ilaavoq. Ilaatigut DIN-imi illutat napparsimasut nallavii katsorsaasarfiillu marluk isaterneqarnissaat aammalu illutamik nutaamik ullutsinnullu naleqquttumik nakorsartittunut pilatsittunullu immikkoortotami nallavissanik katsorsaasarfinnullu kiisalu

allaffinnik napparsimasullu akunnittarfiata ilassutissaanik sanaartornissamik  
kaammattuusiortoqarpoq.

Inussiarnersumik inuulluaqqusillunga

  
Martha Abelsen